

Դ Է Պ Ի Ա Ն Ի

Անին է հեռուում...

Վերջալոյսի ոսկեփայլ մշուշի միջից աղօտ ուրուագծերով յեղյեղւում են ինչոր անորոշ ձևեր հարթութեան ու բլուրնե-
րի վրայ և արևի մեռնող շողերի հետ ամենքը միասին կարծես
հեռւում են հոգևարբի մունջ տագնապով:

Դարերի հոգևարքը...

Եւ դեռ չի մեռել նա, այդ վիրնւոր ու լալկան Անին,
հին օրերից իմ անձկութեան ու երազների առարկան, որի սը-
գաւոր ոգին քայլ առ քայլ ուղեկցել է ինձ բոլոր իմ թափա-
ռուսների ժամանակ օտար հորիզոնների տակ, փսփսացել է իմ
ականջին իր հսկայ վիշտը. երբ աստանդական կեանքից յոգ-
նած իմ ճակատը դնում էի օտար աւերակների մամուլապատ
քարերի վրայ տիեզերական ցաւը երազելով: Նրա գունատ
պատկերը ինձ հետ սգում էր Պոմպէի աւերակների մէջ և հե-
ռուից վշտոտ հայեացքով թարթում էր ինձ, երբ ես դանդաղում
էի Ֆորումի հսկայ կամարների տակ, եւ ամեն տեղ իմ երեւա-
կայութիւնը վերստեղծում էր նրան խենթ քմահաճոյքով, փա-
րում էր նրա վէրքերին աւերակների բաղեղի պէս, իսկ հոգիս
մխում ու ծունկ էր իջնում նրա առաջ պաշտամունքի լուռ-
թեամբ:

Բոլոր անցած փառքերի լուռ բեկորների մէջ ես միշտ
Անին եմ տեսել, Անին երազել և սիրել: Եւ նրա կարօտի թա-
խիծը ինչպէս մի մորմորացող վէրք, երկրէ երկիր ման եմ ա-
ծել ինձ հետ:

Այժմ Անին է հեռուում... բոլոր միւս մտքերս լռում են
ինչպէս խոնջած թռչուններ, որոնք երեկոյեան հանգչում են
ոստերի վրայ. հոգիս անհամբեր ու խանդավառ՝ թափ է առ-
նում վայրկեան առաջ ապրելու նրա մահաշունչ լուռթիւնը,

նրա համը ցաւերը, որոնք գալարուում են աւեր կամարներէ տակ:

Անիւն է իմ առաջը, այդ պառաւ ու հիւանդ մայրը, որի չորացած կրծքի վրայ գնում եմ սգալու այնքան թանկագին կորուստները և անցնող մեծութիւնների սև վախճանը:

Մօտենում ենք:

Պարիսպների երկար կարաւանն է մեր առաջը, մի յոգնած կարաւան՝ որ կարծես հեռուից, շատ հեռուից եկել է հասել այստեղ, բայց վիրաւոր ու կողոպտուած ծունկ է չոքել հարթութեան վրայ այլևս երբէք չբարձրանալու համար: Զգիտես ինչ կայ ներսում, այդ պարիսպների յետում, թիւնն են ծածկում նրանք իրանց ծովում, չարչարուած թիկունքներէ տակ, կ'ուզէիր թե առնել սլանալ և մի ակնթարթում դիտել այդ խորհրդաւոր շէնքերը, բայց առաջդ է Հովուի եկեղեցին, աւերակների սևաւոր կարապետը, որ հասկանում է քո հետաքրքրութիւնը և շտապում է քեզ ասել, թէ ինչ կայ այնտեղ, այն պարիսպներից այն կողմը:

Հովուի եկեղեցին աւերակ Անիի պատկերն է:

Մենակ, անտէր ու վիրաւոր:

Սարսափի և մահերի մի անիծուած օրում, երբ ամեն ինչ պղծւում էր ու կործանւում, այդ խղճուկ եկեղեցին մոռացուած որբի պէս, կարծիս փախել է քաղաքից դրսում փրկութիւն որոնելով և այստեղ հարթութեան վրայ ընկել է թշնամիների հարուածների տակ: Կանգ ենք առնում նրա առաջը: Ժողովրդական երևակայութիւնը, որ միշտ սիրում է ոսկեգօծել գունատ իրականութիւնը և անփայլ պատմութիւնը, այս եկեղեցու հիմնարկութեան հետ կապել է մի սիրուն աւանդութիւն: Հաւատացնում են, թէ Բագրատունիների մայրաքաղաքն այնքան հարուստ է եղել, որ մինչև իսկ հովիւը կարողացել է մեն-մենակ իր ծախքով կառուցանել այս եկեղեցին իր կնոջ սիրուն՝ որին մի հանդիսաւոր օր Մայր եկեղեցում տեղ չեն տուել գողոգ տիկիները: «Հագար» եկեղեցուց յետոյ այսպէս է շինուել մի եկեղեցին: Իրօք եկեղեցի չէ սա, այլ մի մատուռ, ճիշտ այնքան մեծ՝ որքան հարկաւոր է պերճ քաղաքի հովուին և իր հպարտ կնոջ աղօթելու համար: Բազմանկիւնի ու գողտրիկ այս շէնքը այնքան թեթև ոճ ունի, որ անգամ իր այս անփառունակ վիճակում յիշեցնում է գեղանի մի կոյս, ճկուն, բարեձև իրանով, համաչափ ու նուրբ կազմուածքով: Առանձին մասերի ներդաշնակութիւնը ամբողջի հետ այն աստիճան կատարեալ է, որ մարդ ճաշակում է շէնքի ճարտարապետական

պօէզիան և սրտի կսկիծով դիտում դեղեցկութեան. այս անդարձ աւերակը:

Եւ կանգնած է նա՝ այդ Հովուի եկեղեցին մի ամայի խոզանի մէջ, որպէս մի լքուած սգաւոր, որ իր բախտակից ընդերբի հետ իր մեծ վիշտը միասին լալու մխիթարութիւնն էլ չունի: Անողորմ կերպով աւերուած է նա... աւերել են և՛ ճամբորդները, և՛ հովիւներն ու հօտաղները, և՛ չարամիտներն ու ժամանակը՝ իր հողմ ու փոթորիկներով. ով՛ ինչպէս կարողացել է, ինչպէս կամեցել, Նախկին փառաւոր շէնքից մնացել է միայն կմախքը, չանգոռուած, կրծոտուած ու անարգուած:

Հովուի եկեղեցին մեզ երկար պահել չի կարողանում: Պարիսպները մօտ են, բոլորովին մօտ, նրանք կանչում, թարթում են մեզ: Աւերակ են, այդ երևում է նաև հեռուից, բայց և այնպէս մեզ թւում է, թէ նրանց յետևում շինութիւն ու բնակութիւն, կեանք ու շարժում կայ: Ներդաշնակութեան հետամուտ ու ծարաւ մարդկային հոգին հրաժարւում է հաւատալ, թէ այդ գոռոզ բուրգերը հսկայ քաղաքի դամբարանի յուշարձաններն են, որոնք կանգուն են միայն նրա համար, որ աշխարհն իմանայ, թէ այնտեղ անդարձ կերպով թաղուած է մի փառաւոր կեանք, մի ամբողջ ազգի մեծութիւն:

Եւ շտապում ենք...

Պարիսպների մայր դռնից բացւում է զարհուրելի իրականութիւնը... մահուան, ոչնչութեան մի մռայլ հեռանկար, որի վրայ սաւառնում է սոսկումը անգամ օրը ցերեկով: Քարեր ու քարեր կոյտ-կոյտ. անկարգ ու այլանդակ թմբեր, փոքրիկ բլուրներ, տեղ-տեղ կիսաւեր, կանգուն շէնքեր, որոնք ջարդուած բանակի վերջին ռազմիկների պէս կարծես գերադոյն պայքարն են մղում անդարձ անկումից առաջ: Կառքը ներս է մտնում պարսպի լայն, խրոխտ կամարի տակից. մի սառն, մեռելային շունչ է փչում մարդու երեսին և սարսուռացնում մարմինը. աւերակների հեքն է այն, որ խուսափում է մեռած քաղաքի վրայից: Ձիերը քայլում են դանդաղութեամբ և նրանց ոտների տակ գետինը դղրդում է խուլ կերպով. թաղուած կեանքն է այն, որ տնջում է ցաւով. ամեն անգամ, երբ մի նոր ոտք դալիս է նրան ճխելու:

Անիումն ենք...

Սկսում են այն մերթ խենթ, մերթ մոլոր թափառումները, որոնք այնպէս յատուկ են աւերակներ այցելութիւններին: Առաջնորդ է մեր սիրելի բանաստեղծ՝ Աւետիք Իսահակեան, Ախուրեանի, աւերակների և Արագածի երգիչը. նա որ վախլուկ եղնիկների յետևից թափառել է Շիրակի բոլոր Ապրիլ, 1905.

մուլար ճամբաներով, մանկութիւնից լացել է Անիի ամեն մի աւերակի մէջ, ամեն մի քարի վրայ: Այստեղ նա իր տանն է կարծես, իր ստացուածքում, ճանաչում է բոլոր խորշերը, պրպտել է բոլոր անկիւնները, գիտէ աւերակների մոռնջ լեզուն:

Դժուար էր աւելի լաւ առաջնորդ ունենալ Անիում: Երբ տարիներ առաջ Աղբիատիկի ամերում Վենետիկի կոնզոլների վրայ, հինաւուրց պալատների աւերակների տակ մենք միասին երազում էինք հայրենի աւերակները, ես երեակայել չէի կարող, թէ միասին պիտի ուխտ երթանք այս յիշատակարաններին: Սա մի երջանիկ դուգադիպութիւն է:

Վերջալոյսի յետին շողերը դեռ դողդում են Ալաճայի կատարների վրայ: մինչև գիշեր դեռ ժամանակ կայ, շտապում ենք դէպի միջնաբերդը: Սրբատաշ քարերի շեղջակոյտի տակ ծածկուած մի բարձր բլուր է այն՝ ուր հին շէնքերից լոկ յիշողութիւններն են մնացել: Երևում են միայն բազմաթիւ շինութիւնների հիմքեր, փշրուած, քանդակազարդ քարեր ցաք ու ցրիւ փոռած՝ ինչպէս մրրկի թափով և այդ բոլոր աւերածի վրայ դեռ կանգուն է հոյակապ պալատի մի անկիւնը, որ արթուն պահապանի պէս այս բարձրութիւնից նայում է առաջը փռուած աւեր քաղաքին: Այստեղ կայ նաև մի փոքրիկ եկեղեցի, պատերի կէսը ներքեից սև և վերը՝ կարմիր քարերով շինուած մի սիրուն շէնք, որ սեղանի կողմի այլանդակ բացուածքով նայում է Ախուրեանին: Ահա բոլորն՝ ինչ մնացել է Բագրատունեաց մայրաքաղաքի Ակրոպոլսից: Ո՛չ պալատներ, ո՛չ դամբարաններ, ո՛չ զօրանոցներ, ո՛չ տաճարներ. այս բոլորի փոխարէն միայն բարձր, քարեր: Ամբողջ դարերի քաղաքական կեանքը հայ արքաների և բիւզանդական կիւրապադատների՝ ծածկուած է այս փլուածքների տակ և առ այժմ խուսափում է մեզանից, ինչպէս անցեալի մշուշի մէջ կորած մի հին աւանդութիւն:

Միջնաբերդը բնականից անսման դիրք ունի. մի կողմից Ախուրեանն է հոսում անդնդախոր ձորի մէջ, միւս կողմից նրան գրկում է Ծաղկաձորը, որի մէջ հեծեծում է մի փոքրիկ վտակ: Ամբողջ քաղաքը իր շրջակայքով, որքան աչքը կարող և կտրել, բացում է հայեացքի առաջ: Ալեզարդ Մասիսը և պառաւ Արագածը նայում են այստեղ: Ալաճայի բարձունքները և Կողբայ սարերը եթերային համբոյր են ուղարկում այս աւերակներին: Լայն, ակնապարար հորիզոն, տեսարանը վեհ է և տխուր:

Այստեղից երևում են նաև աջ ու ձախ ընկած ձորերի

կրծքին բազմաթիւ արհեստական երկյարկանի կամ եռայարկ քարայրներ շարան-շարան: Ինչի՞ են ծառայել դրանք. արդեօք արհեստանոցներ են, խանութներ, թէ՞ բնակարաններ, ուր ապաստան է գտել բազմամարդ քաղաքի պրոլետարեան... Ո՞վ դիտէ, գոնէ մեր հնագէտներից և ոչ մէկը վճռական ձևով մինչև այժմ, այդ հասաց: Շուկայ, արհեստանոց, թէ՞ բնակութեան տեղ, այդ միևնոյն է, մի բան հաստատ է, որ այդ այրերը՝ մի օր, մի ամբողջ կախուած քաղաք են կազմել, ուր եռացել է աշխատաւորների կամ աւետարականների կեանքը: Ձորը թնդացել է նրանց աղաղակներից և ուրախ քրքիջներից, քարեայ կամ այլ սանդուխները անշուշտ կախուած են են եղել այրերի շըրթունքներից, և օձապտոյտ, սիրուն շաւիղները գալարուել են ժայռերի կրծքին դէպի վեր, դէպի վեր: Դիւթական քաղաք, որ ապրել է օդեղէն բարձունքում, անդունդների վրայ, արծիւների բոյնի պէս: Ժամանակը՝ դանդաղ ու յամառ աւերել է ամեն ինչ, սրբել է ձորերի կուրծքը, հեղեղները լուացել են ու լիզել ճանապարհները, այժմ մնացել են միայն քարայրների բերանները, այլանդակ ու անձե, որոնք կոյր աչքերի սև խողչների պէս նայում են աւեր քաղաքին ոչինչ չտեսնելու համար:

Խորածոր Ախուրեանն ու Ծաղկածորը բնական ամրութիւններ են քաղաքին, բայց այդքանը բաւական չի համարուել, այս կողմից էլ պարիսպներ են քաշուած հաստաբետ ու կուռ: Հիացմունքի և զարմանքի արժանի տեսարան են ներկայացնում այդ պարիսպները: Գոյնզգոյն քարերով ճարտարօրէն կերտուած այդ ամրութիւնները, ժայռերի կատարները գրկած՝ խօլ պարով կախուած են իրարից, ձգտում են դէպի ձորը, վազում են անդունդների վրայից, գալարուում են Ախուրեանի ափերով, նայում են ալիքներին լուսթեամբ և ապա կրկին բարձրանում վեր, վեր: Տեղ-տեղ նրանք այնպէս են կախուել խորխորատների վրայ, որ կարծես մի խենթ քմահաճոյքով ուզում են գետը նետուել, կամ փախում են նրա ականջին աւերակների յաւիտենական եղերերգը:

Միջնաբերդի դէմ ու դէմ, մի այլ բլրի վրայ կանգնել է Աղջրկաբերդը (Ղըզ-դալա), գոռոզ ապաստանը գեղեցիկ արքայադստեր, որ, ինչպէս ասում է աւանդութիւնը, խոյս է տուել քաղաքի ժխորից ու աղմուկից և իր ճոխ ապարանքը քաշուել՝ այն ժայռոտ դժուարամատչելի բարձունքների վրայ միայնութեան հանգիստը վայելու համար: Ո՞վ էր այն արքայադուստրը, ի՞նչեր են անցել դարձել այն խորխոր դղեակում, մենաւոր, ժայռը երբ է ամայի դարձել, ո՞ւմ ձեռքով, այդ բոլորը չգիտէ ժողովուրդը:

և նրա խնչ փոյթն է։ Ապրում է հէքիաթը, երեակայութեան այդ գոյնզգոյն թիթեռը, որ պաշտում է գեղեցկութիւնը և ոյժը, և չքնաղ կոյսը դրել է վիշապ—գետի պաշտպանութեան տակ։ Ախուրեանը մի լայն պտոյտով գրկել է քարաժայռն ու դղեակը, ինչպէս մի հսկայական վիշապ, որ օր ու գիշեր հսկում է այնտեղ ապրող գեղանի աղջկայ վրայ։ Հինաւուրց ապարանքն ու բերդը վաղուց են խորտակուել, մոխիր դարձել. եկեղեցու միայն կէսն է կանգուն, երևում հեռուից, բայց հնազանդ գետը դեռ շարունակում է ծեծել քարաժայռի հիմքը, հինաւուրց վիշապը դեռ հսկում է։

Եւ լեզենդան ապրում է...

Վար ենք իջնում Միջնաբերդից և դանդաղ ու մոլաբ քայլերով, դիմում ենք դէպի ձորափը, նստում ենք քարերի վրայ աւելի մօտիկից տեսնելու Ախուրեանն իր ձորում։ Մի լուռ թիւն է իջնում մեր վրայ, ոչ որի շրթունք չի շարժւում, անգամ թեթև բացականչութեան համար. ստեղծւում է հոգեկան այն կացութիւններից մէկը, երբ մարդ առանց խօսքի կարդում է ընկերով ներքին աշխարհը, երբ կեղծիքը դառնում է անկարելի և բոլորի յոյգերը բղխում են մի հատիկ աղբիւրից։ Զէ որ մենք Ախուրեանի ափին ենք նստած.

«Մի գետս Բաբելացւոց անդ նստէաք և լայաք»։

Ես իմ բոլոր թափառումների ժամանակ ոչինչ չեմ յիշում, ընութեան և ոչ մի տեսարան, որի գեղեցկութիւնը այնքան անյոյս թախիծ ունենար, լացի, վշտի այն աստիճան հզօր հաճոյք յարուցանէր մարդու հոգում, որքան Ախուրեանի ձորը, Անիի մօտ՝ աշնանային պայծառ երեկոյին։ Բնութեան իւրաքանչիւր գեղեցկութիւն, որքան և կենսալից ու սրտապարար, որքան և անմասն լինի տխուր յուշերից, ինքն ըստ ինքեան միշտ անուշ, դուրեկան վշտի աղբիւր է։ Բայց Ախուրեանը իր ժայռոտ ձորի մէջ, աւերակների ոտքի տակ, երեկոյեան մշուշով սքողուած՝ ամբողջապէս ցաւ է ու արցունք։ Այդպէս է լինում մատաղ ու գեղեցիկ կոյսը սև դադաղի մէջ, մահուան դալկութիւնը դէմքին, որին նայում ես անթարթ ու յափշտակուած՝ մոռանալով, որ այս գունատ գեղեցկութիւնը վերջալոյսի վաղանցուկ փայլ է միայն և որը շուտով լուծուելու է անյայտի ծոցում։ Ուրիշ խնչ է յիշեցնում Ախուրեանը, գուցէ ստոր կին, ջահիլ ու գեղեցիկ, որ մին-մնակ լալիս է անապատի ամայութեան մէջ կորած մի շիրմի վրայ և նրա հեծկլտանքը լոկ քամիներն են լսում։

Ո՛ւհ այս վշտոտ Ախուրեանը...

Մշտականաչ ափերի մէջ, խորը, խորը, համարեա ան-

դունդներում, բարձրաբերձ ու խոփու ժայռերի տակ՝ հոսում է. նա հնազանդ ու յոգնած՝ անվերջ, ծանր պայքարից՝ հոսում է, գալարում է ցաւագինօրէն, այնպէս որ մարդ ապրում է նրա դաժան կեանքի ճիգը: Եւ նրա ձայնը չի վիրաւոր դադարի մոնչիւն է, այլ մեղմ, թախծոտ վշվշոց, ինչպէս սոյլերը մոլորում են հովերի, ինչպէս սոսափիւնը լալկան ուռիներէ: Նա հեծկլում է այն սգաւորի պէս, որ կորուստի անդառնալիութեան առաջ հնազանդ է, չի ճշում, չի աղմկում, վայնասողն չի բարձրացնում, քանի որ գիտէ, թէ այդ բոլորն անօգուտ է: Դժբախտութեան մէջ գոռոզ Ախուրեան:

Բարձրից նրա վրայ սաւառնում են գիշակները և սիրտ չեն անում ավերին իշնել, ամպերն են սուրալով անցնում, խոյս տալով նրա ահագին վշտից, գիշերները աստղերն են թարթում և չի մէկը նրա յատակին չի հասնում: Արցունքի պղտորութիւն ունի նա, չի ուզում, որ իր մէջ երևան աշխարհի իրերը, որ աստղերը ժպտան, կամ թռչունները զուարճանան իր փայլով: Աւերակների և ժայռերի այլանդակ ստուերներով գոհ է, մնացածի համար անէծք ու արցունք միայն ունի:

Եւ այս ժայռերը... այն լեռների խենթ զաւակներն են սրանք. վիթխարի հոմանիւնների պէս կըքոտ ու ցասկոտ՝ իրար յետեից գրոհ են տուել դէպի գետը, գետի այս սգաւոր գեղեկունին: Ահեղ ու անհեթեթ հսկաների մի խումբան... Նրանք իրար թիկունքից, գլխի վրայից աշխատում են նայել վար, դէպի անդնդախոր ձորը՝ այն տեղ պառկած գեղեցկուհու չըքնաղ մերկութիւնը տեսնելու. և իւրաքանչիւրը դժգոհ իր ընկերից, որ իրանից առաջ է անցել, լաւ տեղը գրաւել, լուռ զայրոյթով նոթերը կիտել, յօնքերը կախել է: Առաջին շարքերը, որոնք տէր են ձորին ու գեղեցկուհուն, իրանց անդարձութեամբ ու մոայլով սարսափելի են, պայքարող գետի անզօր ճիգերի համար քարացած ու թունոտ հեգնութիւն ունին: Նրանք մի խօյ պարով շրջապատել են նրան, զուարճանում են, վայելում են նրա հմայքը, գնում են հետն անվերջ, որպէս յաւիտեանական բանտապահներ, որոնք ուխտել են երբէք չբաժնուել, երբէք մենակ չձգել գեղանի գերուհուն:

Ախուրեանն իր ձորում... Դա մի նիօրէ է, որ ահագին վշտից քարանալու փոխարէն, դատապարտուած է անվերջ սգալու իր նետախոց զաւակները, մի Լաօկօօն է, որ օձերի կծիկների մէջ չի մեռնում, այլ գալարում է ու հեռւում յաւիտեանական հոգեւարդով:

Ախուրեանն իր ձորում... Դա մի անյոյս վշտի սքանչելի

մարմնացումն է, անհուն ցաւի գեղարուեստական հրաշակերտ, որի վարպետը, ինքը բնութիւնն է:

Գնացէ՛ք տեսնելու Ախուրեանն իր ձորում:

Եւ երբ որ գնաք, անպատճառ բարձրացէ՛ք Աղջկաբերդի կատարը: Մի նեղ ու վտանգաւոր արահեպ է առաջնորդում այնտեղ. զգո՛յշ, որ չսայթաքէք. դէպի աջ, անդունդը ահաւոր է, տեղ-տեղ բռնեցէ՛ք ժայռերից, յենուեցէ՛ք քարերին, սողացէ՛ք թէկուզ, բայց բարձրացէ՛ք: Այնտեղ՝ կատարին գեղեցիկ, քանդակուած քարերի մի դէպ է, աւերակ եկեղեցու և ապարանքի բեկորներն են դրանք. կանգուն է մի եկեղեցու պատը: Անցէ՛ք նրա յետևը, մի փոքրիկ տերրաս կայ, մշտականաչ ու հարթ, կանգնեցէ՛ք այնտեղ, բայց վար չնայէ՛ք, ներքևի անդունդը ահաւոր է, գլուխ է պտտում. շունչ է բռնում: Եւ այն անդունդի մէջ դարձեալ Ախուրեանն է, որ գալիս է, կորչում քաքերիդ տակ: Այստեղից բացուող տեսարանի վրայ բնութիւնը գործել է կանխամտածած կերպով, գեղեցկութիւնը խառնել է խորհրդաւոր սարսափին, և ով կամենում է ճաշակել մէկը, ստիպուած է նաև դողալ մի մութ ուժից, որ թագաւորում է այս անդունդների, այս ժայռերի վրայ: Ապրելու զօրեղ բնադդը դարթնում է թափով, բռնում է ամբողջ էութիւնդ, և ակամայ յետ-յետ ես քաշում անդունդի շուրթից, թիկունքդ դէմ տալիս պատին, պինդ քարին ծեփուելու, նրա հետ լուծուելու համար:

Եւ հեռուն... Իհ գնացէ՛ք տեսնելու Ախուրեանն իր ձորում, բայց անպատճառ Աղջկաբերդի ահաւոր, հրաշալի բարձրունքից:

Երեկոյ է, արևը ծածկւում է հորիզոնի յետևում. լեռներից իջնում են այլանդակ ստուերներ. ինչպէս դարան մտած հրէշներ, սողում են դանդաղութեամբ, պրպտում են ձորերն ու կիրճերը, հասնում, փարում են մռայլ աւերակներին, որպէս սգի զգեստներ: Գորշ մառախուղը ժայռերի կատարներից պոկուելով իջնում է դէպի ձորը, յեղեղում է ափերի մէջ և նրա մուգ քօղի տակից գետը հոսում է, ինչպէս կապարի մութ զանգուած՝ անփայլ ու խիստ: Մի խումբ կաքաներ հապճեպ ու աղմկալի թռիչքով բարձրանում են ժայռերի վրայ, վայրկենապէս խռովում երեկոյեան խաղաղութիւնը. և ապա կարծես լուծւում են սև հողի հետ:

Գիշեր է, աւերակների մռայլ գիշեր, որ սև թևերով իջնում է ու թուխս նստում, այնքան դամբարանների վրայ կիսաւեր շէնքերի հագիւ նշմարելի ուրուագծերը դաժան ու հրէշաւոր՝ ղողղողում են թանձր խաւարի մէջ և նրանց հետ մարդու հոգին է գալարւում ու ցաւում: Վրայ է հասնում մի այն-

պիսի լուսթիւն, որ մարդ ակամայ փսփսուկով է խօսում իր ընկերոջ հետ, ինչպէս մեռելատանը՝ դազադի առաջ։ Եւ ընկերոս դարձեալ բանաստեղծն է, որի հետ գիշերային սև խաւարի մէջ քայլում ենք դէպի պարիսպները։ Մեր շուրջը կարծես ողջ դազադներ են այս շարան-շարան աւերակները, մէկը մէկից ահագին, զարհուրելի։ Դազադներ մի կեանքի, որ անցել է անդարձ։ Բոլորի վրայ աստեղազարդ գիշերը թարթում է իր բիւրաւոր աչքերը անկարեկից ու անյոյզ։ Արտասուելի է մըտածել, որ մի օր կեանքի, խնդութեան, փառքի վրայ փայլփրլող աստղերը այժմ էլ ժպտում են գերեզմաններին ու աւերածին, նոյնքան անհոգ, նոյնքան անգիտակից, որքան դարեր առաջ։ Երկիրնքն ու երկիրը կապուած չեն իրար հետ ցաւի և ցնծութեան գիւթական շղթայով։ մարդն է լցրել տիեզերքի անհունութիւնը սիոփիչ պատրանքներով։

Խեղճ մարդ...

Քայլում ենք առաջ. մեր մտքերը սև են, ինչպէս մեր գլուխների վրայ ծանրացած գիշերը։ Մենք էլ մեր պատրանքներն ունենք, որով տարւում ենք այս խաւարի մէջ։

Անին. գիշեր ժամանակ... Տիկ է թափառել գերեզմաններում և ականջ դրել լացող խաւարի հեծկտանքներին։ Մէկը խօսում է, փսփսում, անքում. մի մութ խողովում ճանկեր կան, որոնք քարն են չանգւում. մեռել է արդեօք, որ փորձում է դուրս սողալ դամբարանից։ Մի փլուածքի տակ մի ուրիշը մրմնջում է ցաւով ու տանջանքով, Տիկ, Տիկն է խեղդում, Տիկքեր են կրծոտում իրար խաւարի մէջ։ Ահա մի ոտնաձայն, էլի մէկը, էլի մէկը, քայլում են շտապ-շտապ, փախչում են դանազան կողմեր, կանգ առան. ականջ են դնում արդեօք, մեղանից փախան... նայում ես շուրջդ, դէպի յետ, հեռուն, և... ոչինչ, ոչինչ. այդ բոլորը քամին է, աւերակների խենթ քամին և խաւարից շփոթուած երևակայութիւնդ։

Պարիսպների մօտ ենք։ Գիշերով սրանք էլ զարհուրելի են։ Թևատարած ու վիրաւոր հսկաններ, որոնք անիծում են և կատաղաբար բռնեցք ցոյց տալիս երկնքին նրա անգթութեան, անկարեկից հայեացքի համար։ Բացուածքներ ունին նրանք, որոնց միջից մի հատիկ աստղ կաթեցնում է իր գունատ շողերը, առանց փայլ տալու մռայլ պատկերին։ Քամին հեծեծում է նրանց խոցերի մէջ և մութ տեղերում կարծես վիրաւոր գազաններ են կաղկանձում։

Ո՛ւհ այս քամին. ճրտեղից է փչում նա միշտ մեղմ, միշտ լալկան. չոր խոտերն և թփերը խշխշում են, քարերը տնքում են, կամարները հեռում, և ամենքը միասին լալիս են, լալիս։

Իմ ձեռնափայտը զարկում է գետնին, հողն էլ արձագանգ է տալիս, որ խառնում է քամու հետ: Սաւաբը թանձր է, ոչինչ չի երևում հեռուից, քայլում ես և յանկարծ առաջդ է ցցւում մի ահագին շէնքի մութ զանգուածը, յետոյ էլի մի ուրիշը. ու թւում է թէ նրանք անթիւ են, երկրի արգանդից են դուրս վիժում, ուր թաղուած էին դարերից ի վեր, բարձրանում են իրար յետևից և նոյնպէս դողդողում են, ուժգին հեծկտանքից ցնցւում իրանց ամբողջ կազմով և միանում քամու մշտական ողբ ու կոծին:

Աննկատելի կերպով պտոյտ ենք գործում, քայլում դէպի հարաւ: Վերստին մեր առաջն է Ախուրեանը: Նրա վրայ խաւարն ասես աւելի թանձր է, աւելի սև, ու սողում է գաղտադողի կերպով, հրէշի պէս, սողում է անձայն, իսկ նրա տակ ալիքներն են հեծեծում: Այժմ նրանց ձայնն աւելի ուժգին է և աւելի յուզիչ: Շրջակայքում ամեն ինչ կարծես այդ վշվշտցող գետին է ականջ դնում և նա պատմում է, պատմում: Ի՞նչ ես հեկեկում լալկան ու հիւանդ երեխայի պէս, որբացած գետ, ինչեր ես տեսել հին օրերում, արդեօք ի՞նչու ես այդպէս գիշեր ցերեկ մոմուռ քամում:

Հեռու, հեռու շներ են հաչում, խաւարը դողդողում է, գետը վշվշտում, և լեռները նիրհում անդորը ու լուռ: Մի թըռչուն ճչաց ձորի մէջ ու լեց: Քամին սաստկացաւ և իր հետ բերեց հազար ու մի ձայներ: Շների ոռնոցը, չգիտես ինչո՞ւ, աւելի բարձր, աւելի կատաղի դարձաւ: Քամին և արդեօք դժգոհ նրանք. թէ՞ գետի շառաչից, կամ գուցէ լուռ աւերակների վրայ են հաջում, որոնք կանգնած են, սարսափելի են և չեն խօսում:

Կրկին լուռթիւն, գետն է վշվշտում միակերպ, անվերջ, և նրա ձայնը, որպէս անդուլ օրօր՝ քաղցրացնում է աւերակների քունը: «Բարի գիշեր, հանգիստ քուն» մրմնջում են մեր շըրթունքները:

Եւ գետը բողբոջում է, գետը վշվշտում է... չէ՞ որ դարեր է, ինչ նրա համար չկայ ո՛չ «բարի գիշեր» և ո՛չ «հանգիստ քուն»:

Ա. Ահարոնեան